

陶文毅公全集

陶文毅公全集卷十八目錄

奏疏 鹽法

會同兩湖督撫籌議楚省鹽務摺子

彙報浙鹽引地緝私情形摺子

覆陳淮粵引界事宜摺子

淮北改行票鹽請免州縣考核摺子

劉運使急公出缺請派大臣查辦淮鹺摺子

恭奉

恩諭敬陳感勉下忱摺子

淮南丁酉綱無著懸引請提出二十一萬引融於

淮北行銷摺子

覆奏籌議稽察場電章程摺子

請將淮北票鹽每引加徵雜課二錢同票鹽溢課
經費盈餘一併協貼淮南雜款摺子

奏明票鹽驗費掛號章程附片

欽遵

諭旨保薦運使摺子

查核上海會館并無囤貯私鹽暨舟山地方產鹽

應歸浙江經理摺子

覆奏范隄開壩例禁啟閉附片

淮南戊戌綱鹽請援案提出二十二萬引融運淮

北摺子

淮北戊戌綱票鹽溢課經費盈餘及加增雜課合
共銀三十六萬餘兩協貼淮南雜款附片

淮南戊戌懸引仍請融北摺子

續陳八年來辦理兩淮鹽務并報完銀數比較在
前情形附片

奏疏鹽法

會同兩湖督撫籌議楚省離務摺子

奏爲會籌楚省離務緝銷事宜恭摺

奏祈

聖鑒事竊臣陶澍欽奉

諭旨派赴江西安徽一帶校閱營伍

奏請順道回籍修墓并乘便會同臣訥爾經額臣周

之琦臣裕泰籌商淮鹽緝銷事宜仰荷

聖鑒所有湖南離務臣陶澍前過長沙曾經晤商臣裕

泰茲由洞庭順帆東下於十一月初七日行抵鄂

垣與臣訥爾經額臣周之琦會晤復將釐務彼此

悉心籌議緣湖廣北南兩省爲行銷淮綱最重口

岸每年額引七十七萬九千九百餘道而綱載之

儀徵老河影距貯鹽之漢鎮相隔幾及二千里長

江險阻風信靡常挽運本屬不易加以船戶水手

之夾私盜賣中途節節逗遛稽察吏屬難周且楚

省係水陸通衢界連川粵豫皖等省四通八達鄰

私最易侵灌防範設或稍疎卽致貽害腹地內如

湖北宜昌府屬之官渡卡緊接川江從前銅鉛船

自四川裝運北上一路收買川私入楚售賣經由

寺隘並不聽候查驗以致宜昌一郡盡食川私并
灌及下游荊州各屬與荆門之遠安當陽湖南之
澧州石門等處大爲淮綱之害卽經議定章程奏
奉

諭旨飭令宜昌鎮總兵親督卡運各員查驗催趲并雲
貴四川各督撫飭令沿途各州縣嚴禁售給該船
戶鹽斤自奉行一載以來宜昌一帶水道川私嚴
行堵截銷數日有進步又隨州應山切連豫省信
陽州等處多被潞私侵灌黃安麻城切近光山固
始及皖省英山等處多被蘆私侵占接近淮北票

鹽之處亦有闌入皆因小民趨利若鶩貪賤食私

緣山越嶺輾轉售賣前經

臣

陶澍於淮北英山等

處設卡并派六安營參將趙承德等帶兵以時巡

歷查拏復經

臣

訥爾經額

臣

周之琦派令湖北鹽

道于克襄親往黃州各屬勘明要隘分設卡座堵

緝近來銷數已有轉機又襄陽府各屬與豫省南

陽各處犬牙相錯豫省行銷潞鹽較之淮鹽價值

貴賤懸殊侵灌本易而豫省奸商又復逼近楚境

廣開子店甚至包運到楚轉賣以致占礙淮綱大

爲官引之害現於奉

旨飭拏匪犯張開運案內究出梟販多名拘獲究辦以
示懲創應俟會同河南撫臣籌議疏緝章程另行
具

奏又湖南郴州所屬之永興縣係粵鹽引地粵商開
設子店行銷生鹽與淮界熟鹽本有區別詎粵商
藉海船艙底沙泥准其煎熬名色多設熬鍋將生
鹽煎熟侵灌淮界以致楚省引額短絀道光十一
年經前任湖廣督臣盧坤奏奉

諭旨必應嚴定章程令各守地界酌定熬鍋額數永定
限制毋許私增多設等因欽此盧坤當卽欽遵飭令

兩省委員核議嗣經盧坤核定每子店一家准其
留鑪一口咨商粵省而粵省總以熬鍋不能定數
爲詞及盧坤調任廣東臣訥爾經額頻年文移往
返咨商而粵商又紛紛具呈終不肯酌定額數以
致迄無成議影射多熬充賺淮引在所不免伏思
粵省來咨以粵鹽係通省融銷若將永興子店限
定熬鍋口數該省引課卽有阻滯兼以楚省所議
拏獲販私人犯例應訊明來厯如訊係永興子店
所賣咨提究辦乃謂楚人自犯之罪與粵省子店
無涉不應妄扳拖累等語伏思緝私扼要必當澄

本清源惟不稍存畛域始能各固藩籬粵省融銷
分數未必全在永興一縣何以不能定額行銷且
熬鍋係爲煎熬海船船底泥沙而設爲數甚微何
能藉此裕課其必欲廣設熬鍋無非藉端影射將
生鹽煎熟混雜侵灌淮界是粵課固可寬裕而淮
引卽被侵占剝肉補瘡於公何補且查湖南省頻
年詳辦販賣粵私案件不一而足雖各犯罪由自
取而多留熬鍋爲奸商開偷漏之門陷愚民蹈販
私之網於理似屬未協事關有礙淮引若不定以
限制誠恐愈增愈多無所底止查永興縣現存子

店六十五家相應請

旨飭下兩廣督_臣將永興子店六十五家每家只准存
鍋一口永爲定額不准私自加增及添設子店鍋
口尺寸亦不准稍有寬大總期於粵引准綱兩無
妨礙至於拏獲私鹽須照例究明買鹽來厯行提
審辦粵商更不得規避狡卸失察私鹽出境地方
文武各官亦應照例議處庶可各知儆戒以固藩
籬此外疏銷事宜前次立法已詳如有應因利乘
便之處隨時斟酌辦理不令窒礙_臣等惟有隨地
隨時同心協力認真經理以冀課裕引暢仰副

皇上整飭離綱之至意所有_臣等會籌淮離緝銷事宜

謹合詞恭摺具

奏伏乞

皇上聖鑒訓示再_臣陶澍拜摺後卽日起程由水路回

江辦事合併陳明謹

奏

道光六年十一月十二日具

奏嗣准湖廣總督訥咨道光十六年十二月二十九

日奉到

硃批另有旨欽此同日承准

軍機大臣片知貴督等具奏前事本日奉有寄信
諭旨飭兩廣總督鄧辦理矣

彙報浙鹽引地緝私情形摺子

奏爲彙報江省督緝淮私侵浙各案犯併功鹽數目
仰祈

聖鑒事竊照各省行鹽引地均有疆界不能不畫地自
守而又有不容過分畛域者蓋鹽務雖有彼此同
一攸關

國課不能任私充斥倘或但知顧己以鄰爲壑於本
境官課未必有益而彼境已大受其累旣違恕道
且長刁風殊非協力爲公之道臣所管兩淮鹽務
名爲六省其實淮北鹽行皖豫課祇四十萬餘兩

江省惟江寧揚通等屬有課爲數甚微其餘或例食他鹽或暗被私占如江西之吉臨撫康湖北之荆宜安德已官私各半其餘建饒各屬以及襄鄖衡永寶辰各官均屬虛存名目所真食淮鹽者南昌瑞州袁州與武昌漢陽黃州及湖南之長岳常澧十府而已而淮課正雜五六百萬加以鹽木運腳包索船錢一切商夥盤纏與夫商店食用及賀貸利息又須三四倍於課額是以每行一綱之鹽必得二千餘萬之銀取資於十數府之百姓最爲艱鉅民力難支往往避而食私而其地距淮近者

千里遠或三四千里鞭長莫及且在他省轄內借
助於人實難得力因思巡緝之責惟近爲能江浙
引地相連如蘇松常鎮太四府一州係江蘇一省
菁華然皆例食浙鹽距淮南通太各場僅一江之
隔片葦可航易被淮私充斥經臣督飭各營認真
緝拏無分彼此如糧船過江每歲代浙一例梭查
外其餘大小梟販有闖入浙省界內者隨時立拏
懲辦其出力各員分別獎勸有由臣奏咨在案者
有咨照浙省辦理者有續獲尙未辦出者統計此
五六年中凡淮鹽偷漏侵入浙引界地者前後飭

據提鎮各標及吳淞鎮京口高資常州川沙福山
金山南匯劉河等營并海防各員共報獲六十四
起獲梟犯二百九十七名私鹽四十六萬一千五
百二十七斤大小私船八十三隻槍礮火藥刀劍
木棍多件均經札飭地方官分別審擬按律懲辦
在案此係地方職分應爲并非藉此鳴勞惟思文
武各員旣能無分疆界念切爲公臣亦不敢泯滅
其績謹據實彙陳藉紓

聖主整飭鹽綱之意抑臣更有請者安徽之徽州府與
江西之廣信府例食浙鹽均在兩省腹地私鹽由

漸灌入以致饒州與撫建南康九江及皖省之池
州寧國太平等府均被侵占久假不歸而浙商方
且執圖便民食爲詞多於徽州廣信等府鄰界之
邊開設私店大爲淮鹽之害合無仰懇

聖恩飭諭浙省嚴查奸商假公濟私之弊悉予拆除在
浙江撫臣烏爾恭阿素秉公正滌弊懲奸無分遠
邇得荷

諭旨整頓更期得力倘蒙推廣

德威通諭各省一體照辦俾行鹽則各依疆界緝私則
無分彼此同心同力裕

課便民又不獨淮鹽一隅獲資利益矣除將緝獲淮私侵浙各案犯鹽數開單敬呈

御覽外謹繕摺具

奏伏乞

皇上聖鑒訓示謹

奏

道光十七年二月十二日奉到

硃批另有旨欽此同日奉到道光十七年正月三十日

內閣奉

上諭鹽引暢銷總期裕課便民各該督撫奉公盡職原

應不分畛域而所轄引地亦宜劃清界限以杜侵越
方爲辦理妥協茲據陶澍奏稱安徽之徽州府與江
西之廣信府例食浙鹽均在兩省腹地私鹽由浙灌
入以致安徽江西各府均被侵占在浙商總以便民
食爲詞每於徽州廣信等府鄰界之邊開設私店而
淮鹽受害漸有侵占之虞著烏爾恭阿嚴查奸商禁
止偷販除假公濟私之弊杜越境售私之習整頓自
爲得力各省一體照辦俾行鹽則各依疆界緝私則
無分彼此庶鹽務日有起色而轉銷各有責成矣欽
此

覆陳淮粵引界事宜摺子

奏爲恭摺先行覆陳淮粵引界事宜仰祈

聖鑒事竊

臣

於道光十六年十二月二十九日准戶部

咨奉

上諭御史黃樂之奏請勘明淮粵行鹽引地并設卡巡察以杜私銷一摺著陶澍鄧廷楨會同詳查妥議具奏摺併發欽此伏查江西南昌吉安等府例食淮鹽其南安贛州二府寧都一州所轄十五縣廳均食粵鹽嶺路交迴處處可通其水則章江自西貢江自東同會於贛縣之城北又北經儲潭至攸鎮則

與吉安府之萬安縣接壤例食淮鹽者也贛勢居

高臨下最易衝斥淮界嘉慶二十三年道光九年

疊經前任兩江督臣查照雍正年間成案請酌定

店座撤留十二年臣因籌堵粵私章程復經

奏交部覆准行十三年前兩廣督臣盧坤復翻臣議

經戶部奏請

敕下臣等屏除意見會同妥議具奏在案數年以來屢

經臣往返函商并由部彙案行催而粵省堅執前

詞礙難遷就定案上年又經臣咨商兩廣督臣鄧

廷楨嶺外迢遙迄今尚未覆定茲因御史黃樂之

奏仰蒙

諭飭會議伏查淮粵引界該御史奏請定議者二事曰
官店裁留曰汎卡移設臣與粵省岐互者尙有二
事曰熬鍋核數曰贛關點包除贛縣泥灣一卡粵
省以在引界腹心之內未便設巡飭據西省司道
議詳改設於萬安縣之崑崙塘兩岸該處在攸鎮
下游雖未能如泥灣之得力但係粵私入淮門戶
退回設卡亦足資堵緝業已咨商兩廣會核辦理
至官店裁留一節道光十一年議將攸鎮五店裁
二留二本係粵省委員勘定非由江省主議以致

裁少留多在江省猶仍舊患乃十三年粵省議奏
復以江西驛站官塘實在攸鎮西岸東岸并無一
店西岸五店離淮界三十里外卽應全留等情不
知粵鹽設店於西岸而居民多在東岸西岸鹽店
雖屬三十里外東岸民居僅距淮界二十二里零
舍東就西已非便民之道且贛縣邊界至攸鎮而
止攸鎮爲贛縣極北之境其東西南三面村鎮戶
口尤多粵商開設埠店不開於墟市適中之地使
四境居民得以就便買食而開於逼臨淮界之邊
豈邊界則須便民而腹地可聽民往返乎今計里

則憑驛站設店則築河沿謂非藉地行私以遂其
充賺之計其誰信之若仍照數全留旣與雍正年
間准設一二店之案相背更較道光十一年裁二
留三之議不符此攸鎮五店仍應照前酌裁之原
委也再粵鹽由曬掃而成不需鍋竈與淮鹽出自
煎熬色質迥殊粵商靠邊立店多設熬鍋使生鹽
變熟與淮南無異以爲朦混侵銷之計今縱不能
拔本塞源將熬鍋盡革又豈可任其愈出愈多漫
無限制前經司道等議以攸鎮三店每店姑准酌
留熬鍋二十二口共六十六口每鍋每日計可熬

鹽五十餘斤每日共可出鹽三千三百餘斤生熟兼銷每日可售鹽六千七百餘斤每年銷數約二百四十餘萬斤計贛縣每年額銷粵引一萬五千八百一十七道零除沙地墟一店大湖江之元亨利貞四店所設熬鍋不議外以下游之雲泉章水二鄉戶口而計每年不過分銷鹽數十萬斤今以攸鎮臨邊一隅之地視額銷之數已增至十倍之多每年縱有融引亦斷不至復虞缺乏現在湖南永興之粵鹽熬鍋計子店六十五家已奏請

飭下粵省每家止准存鍋一口不許加增所有攸鎮事

同一例自應核實查減以符體制又贛關點驗儲
潭照票均係粵省舊章是以嘉慶十七年兩廣運
司來移有照例驗放之文二十四年粵省總督來
咨又有贛關點驗之語乃粵商支離其詞以照例
驗放指爲暫時外辦章程贛關稽查稱爲原文聲
敘未晰惟欲一概免查以遂其夾帶多斤之弊更
以刁難誤運等語巧爲掩飾殊不思贛關爲南北
通商之所百貨往來從無留難守候豈以運行贛
縣之鹽已抵贛縣之腹地咫尺報查轉慮稽遲誤
運之理自應仍請查照前次奏奉

前旨由贛南道西關點驗填給子埠照票於儲潭查驗
放行并責成督銷之贛縣每月查明到埠分銷各
數造冊加結報查以期核實而免侵銷此又熬鍋
必須定數贛關必應點包之各實情也竊思淮粵
引地同關

國課不容岐視如果衝淮而有益於粵尙爲有說之
辭第贛關既不點驗則公私莫辨徒使私鹽假官
爲名而於粵課仍然無益况粵鹽行銷贛埠課止
數萬淮鹽行銷江西課至百餘萬兩權其輕重已
不能任粵充斥而粵鹽自雄贛建瓴直下其勢莫

過如境內稽察全無必致梟橫罔忌堵禦尤難卽
設卡亦復何益兼之江西建撫等郡接近閩私充
斥已甚廣信一府例食浙鹽以致饒州南康多被
浙私所占侵及安徽若贛境藩籬盡撤則更四面
受敵必致西岸淮鹽愈滯不得不據實剖陳非敢
爭執理勢實然也臣與兩廣督臣鄧廷楨各領封
圻彼此并無成見惟當欽遵

諭旨詳查妥議以期淮粵兩裨仰副

皇上整飭離綱之至意除飛咨粵省督臣會議具奏外

合先恭摺縷悉覆

奏伏乞

聖鑒謹

奏

道光十七年二月十二日奉到

硃批知道了欽此

淮北改行票鹽請免州縣考核摺子

奏爲淮北鹽引改行票鹽請免州縣考核以歸核實

仰祈

聖鑒事竊查淮北綱食各岸前因改行票鹽經臣將各

州縣銷鹽考核於道光十二年

奏請俟試行一二年後察看情形再行酌議具

奏欽奉

諭旨俞允在案茲查淮北改行票鹽以來按綱請運足

額且有溢請之引均係票販自行運售并未由各

州縣督銷覆查票鹽章程如所指州縣鹽壅滯銷

准其轉運他岸販賣惟不准越出行票州縣之外
是各州縣缺溢之數全難作爲定準咎無可任亦
功無可居所有淮北鹽引行銷綱食各岸考核州
縣督銷之處應請免置議以歸核實據鹽運使劉
萬程詳請具

奏前來理合恭摺具

奏伏乞

皇上聖鑒

訓示祇遵謹

奏

道光十七年三月十一日奉到

硃批該部議奏欽此

劉運使急公出缺請派大臣查辦淮鹺摺子

奏爲遵

旨詳細查明據實覆

奏仰祈

聖鑒事三月二十四日承准軍機大臣字寄道光十七年三月十七日奉

上諭本日陶澍奏兩淮鹽運使出缺據稱轉據兩淮鹽運使劉萬程家人焦升稟稱該運使於二月二十九日夜間自縊該運使係三品大員何以無故輕生是否另有別情著陶澍詳細查明據實覆奏不准稍有

含混該故員靈柩及其家屬著俟續奉諭旨到日再行飭令回籍將此諭令知之欽此遵

旨寄信前來除飭令劉萬程靈柩家屬暫緩回籍恭候續奉

諭旨外伏查該運使劉萬程出缺緣由臣已據揚州府縣轉據該家屬切實供明并親查確訪委係因勞致疾痰發輕生此外并無他故業於本月十二日縷悉

奏明在案惟其中瑣屑下情尙有不敢瀆陳於

聖主之前者茲蒙

諭旨令臣詳細查明據實覆奏何敢稍有含混查該運司之輕生由於病發痰迷其所以病發之故則實由於慮竭急公之所致兩淮鹽務繁重甲於天下運司駐劄揚州止能於各商催徵催運不能於各岸督緝督銷是名爲轄六省之引地實不能遙操六省之事權前經奉

旨以運鹽責之兩淮以銷鹽責之江西湖廣仰見

聖明洞鑒實握鑿法全樞而一切引課奏銷向惟鹽政運司獨當其責此中掣肘情形不敢不逐一陳之一則課額之遞增難減也兩淮額徵引課有正有

雜正款較之康熙雍正年間數已遞增雜款則如
帑利之歲需七十餘萬不但利過於本而本已早
罄於前人現帶皆無本之息若鹽規匣費之由陋
規而改其名目亦遂相沿以爲緊款幾與辦公之
課無異此外如河漕臣及各養廉薪水書役廩工
紙飯巡費兵餉尤爲經費所關不容不按額解發
至於書樓書院普濟育嬰等善堂每歲所需亦均
歸入科則按引徵收在當時增之卽未必甚易而
及今刪減則勢更有所難矣自道光十一年以來
雖有刪減浮費二百六十萬之文其實惟辦公一

款減去四十萬外支雜費減去十萬有關科則若
漢岸減費六十萬則出自已經完課之岸鹽根窩
價值一百三十餘萬則把持缺底之人所得存之
均足以病運商而減之亦於課項無與也現課仍
需五六百萬非必一無可減而苦於不能減課既
不減引豈可缺此岸銷不暢而年額難以年清之
實情也一則費本太重難於旋轉也淮課幾及六
百萬買鹽之價倍之出場過壩掘工船戶之費亦
如之而到岸規費賀借利息與夫岸店廝夥食用
一切之需且過之是以每運一綱成本需二千數

百萬之多前鹽未售則貲本占閣後綱無課可納
近來商力疲乏能運四五萬引者無多十數萬引
者更少其餘小商貲本更微去來無定每屆開綱
不得不照滾總之法攤派行運間有未完復須加
派任愈重而力愈微此岸銷不暢商本無可轉旋
之實情也一則完課之期不能一例也淮南鹽法
商人納課向分請呈加三則并非一次或單已請
而無力買鹽卽不能呈綱或綱已呈而無貲捆運
則加斤又滯必須前鹽回課而後運乃繼是三者
皆有待於岸銷轉運方靈卽或三限無阻而無力

開江守候仍滯不得已而援案緩納以免到岸之
稽延奈岸銷不暢卽緩納仍無現課可回而運庫
待用已急勢不能本綱之款必用本綱之銀此又
岸銷不暢則錢糧不能各歸各款之由也一則各
岸私侵不能盡絕也查淮南行銷引地爲鄰私占
踞者如蘆私及淮北之私所侵尙不過邊境三五
州縣若潞私之侵襄陽荊門安陸德安下逮漢川
與川私之侵宜昌鄖陽荊州沔陽旁逮辰澧粵私
之侵衡州永州寶慶吉安臨江旁逮萍鄉醴陵統
計十四府八十餘州縣閩私之侵建昌撫州浙私

之侵寧國池州太平饒州上建都昌湖口統計六府三十餘州縣皆縱橫蔓延無處非私至船戶夾帶如浙私之透在沿江各岸者亦皆順載赴楚更不比儀徵老虎涇等處設有巡緝與糧私之經過揚州懾於按查而斂迹也夫惟鄰私之侵占太多是以各岸之疏銷愈滯查楚西各岸自道光十一年開辦辛卯綱引運鹽到岸已在是年秋冬及十一年春夏之間占閤已半年有餘且其時口岸存積殘鹽本已七十餘萬引并有已丑以前各綱已請未運之鹽五十餘萬引皆係辛卯後始行運銷

連辛壬癸甲丙五綱應銷鹽六百九十餘萬引又
辛壬兩綱帶銷已庚殘鹽七十餘萬引通共應銷
新殘引鹽約九百萬引今自道光十一年起至十
六年止計湖廣江西併安慶池州太平及各食岸
共止銷鹽五百三十餘萬引而湖廣共未銷鹽四
十五萬九千二百四引江西共未銷鹽五十萬七
千八百引安慶池州太平等府屬亦然六年之中
綱食各岸共計滯銷鹽一百數十萬引卽各省設
法疏銷未必能一年之內俱能掃清而淮南後運
之鹽轉瞬已積各商如何行運課額何以清完各

省行銷之地分計考成其責猶輕一鹽臣一運司
鉅任獨肩責無旁貸仰屋躊躇徬徨中夜此前運
司俞德淵所以勞心焦慮而一病不起後運司劉
萬程所以心力交悴而病發輕生也計臣自道光
十一年辛卯受事以來率同前後運司同心竭力
欽遵

諭旨整飭額綱設法籌運至現辦丙申綱止業已五綱
共完解過銀一千六百九十萬九千六百餘兩均
係實銀實解冊揭全符內淮北奏銷銀一百九十
一萬八千二百餘兩溢課已逾定額又南北帶殘

新疆經費積欠濫價共銀二百六十八萬三千六百餘兩外有印本九十餘萬兩均係從前短缺此時代徵代補之款其淮南奏銷前後已報完銀九百六十九萬五千餘兩未完者甲午尙有九釐兩申尙有一分九釐又京外帑利鹽規厘費雖已解過銀三百十四萬二千二百餘兩仍未解銀二百三十二萬四千七百餘兩俟口岸回課亦可陸續完解以上各款雖比之道光二年至十年屢次所查虧欠銀五千七百數十萬兩爲數懸殊第各處需用甚亟屢煩

奏催迴非從前可比兼之運司短見輕生難免物議
紛騰而現在商人甫經趕完丙申奏銷筋力已盡
轉瞬丁酉開綱併令補完舊課如使岸銷仍滯實
難竭蹶從事臣受

恩深重卽捐糜頂踵不足云報而力單任重深恐駑駘
徒竭無補涓埃惟有仰懇

天恩特派大臣來江查議籌辦俾臻妥善并請

敕下湖廣江西安徽各督撫臣確查口岸現在積存鹽

數趕緊疏銷實力堵緝以便轉輸而收成效謹遵

旨將劉運司急公出缺及淮鹽實在情形詳細查明據

寶覆

奏伏祈

皇上聖鑒訓示謹

奏

道光十七年四月十九日承准

軍機大臣字寄道光十七年四月十三日奉

上諭本日據陶澍奏淮鹽實在情形一摺兩淮鹽務最爲繁重一切催徵催運各事宜該督責無旁貸已故運司劉萬程竭慮急公本屬職分所當爲現因病發輕生該督正當督飭新任運司陸蔭奎認真經理期

於課額無虧方爲不負委任何得因劉萬程一人輒
謂諸事掣肘遽請欽派大臣前往查議籌辦此奏殊
出意外太不成事總之引課奏銷原係該督專責如
果辦理得宜自可日有起色卽謂兩淮責在督運其
督銷之任分寄諸湖廣江西安徽各督撫獨不思江
西安徽均係該督統轄省分其應如何實力堵緝趕
緊疏銷無難與兩省巡撫妥爲籌辦至湖廣分銷各
口岸與淮南本屬一氣相通前已有旨令林則徐盡
心籌畫不分畛域如有應行會議之處儘可隨時咨
商從長計議該督受恩深重惟當實心籌辦不得以

力單任重爲詞藉圖卸責倘畏難觀望以至驕務不見起色朕惟該督是問將此諭令知之欽此又於道

光十七年四月二十三日奉到

硃批此奏殊出意外太不成事矣另有旨欽此又於遵旨將劉運司急公出缺句旁奉

硃直

恭奉

恩諭敬陳感勉下忱摺子

奏爲恭奉

恩諭敬陳感勉下忱仰祈

聖鑒事竊臣前因運司劉萬程出缺遵

旨詳細查明并將淮鹽實在情形據實縷陳接奉

諭旨兩淮鹽務最爲繁重一切催徵催運各事宜該督
責無旁貸正當督飭新任運司陸蔭奎認真經理期
於課額無虧方爲不負委任何得因劉萬程一人輒
謂諸事掣肘遽請欽派大臣前往查議籌辦此奏殊

出意外太不成事總之引課奏銷原係該督專責如果辦理得宜自可日有起色該督惟當實心籌辦不得以力單任重爲詞藉圖卸責等因欽此跪聆之下感悚難名伏念臣自道光十一年接管鹽務適當疲敝之後山窮水盡無可措手仰蒙

皇上指示多方格外

體卹俾

臣

得以從容布置釐滌虛浮數年以來正課幸

尙無虧雜款亦多清解惟帑利鹽規仍有欠缺總因各岸未能暢銷商課無從轉納兼之淮南鹽法向有請呈加名目分爲三次完納率前搭後每須

三兩年始能辦竣一綱而各處需用則以年爲計不能俟一綱之竣以致催索頻仍不敷肆應此係納課成例如此并不始自近今顧從前往往以正墊雜故虧款雖鉅而催索無聞今則先儘正款而雜款稍後故欠項雖不及從前百分之一而催促反倍於前也屢煩

奏請實切難安計惟有多銷一綱之鹽方能預墊一綱之用乃各處私充引積不但不能多銷而且滯銷日甚商本占閣後運難繼區區之愚深恐一人之思力未周無以仰答

高深是以瀆懇

天恩特派大臣來江籌議俾臻妥善而焦急之餘不自知其措詞之失當茲蒙

聖主訓誨周詳

諄諄策勵江安兩省無難會商妥籌湖廣督撫更得從長計議臣才識疎庸利鈍非所逆覩然受

恩深重分切捐糜萬無諉卸之理况現在鹽務奏銷不誤庫款暫貯尚有銀二三百萬足供正撥之需商情黽勉亦知急公轉輸比之從前究屬已有起色豈可稍形退沮致誤機宜查新任運司陸蔭奎遠

在川西到揚尙早現卽督同護運司姚瑩核定科則將丁酉新綱及分帶乙未各課循照上年章程迅速開徵辦理毋許遷延併札儀徵捆所嚴掣子包另委候補同知伍家格親駐巡查以杜江船夾帶其漢岸水程接據湖北鹽道來稟已經督臣林則徐酌定道里遠近限期由水販交付鹽行送局齎道核銷不准由州縣催繳以免需索留難致礙銷路至揚岸鄰近梟私責成地方文武扼要卡巡嚴行堵緝臣仍以時稽核功過申明賞罰俾員弁咸知激勸協力緝私此外催徵催運各事宜如有

可以變通盡利設法籌維之處容

臣

殫心竭慮隨

時酌擬請

旨遵行斷不敢畏難觀望有負

生成自干咎戾再

臣

前摺齎回敬謹拆閱見摺尾聲敘

劉運司急公出缺句旁欽奉

硃直

臣

檢查底稿係臨繕時於運司出缺之上誤添劉

字

臣

未經看出實屬疎忽曷勝惶汗應請

旨將

臣

交部察議所有

臣

奉到

諭旨感

恩彌奮下忱謹繕摺恭覆伏乞

皇上聖鑒謹

奏

道光十七年五月二十二日奉到

硃批另有旨欽此同日奉到道光十七年五月十一日

內閣奉

上諭前因兩淮運司出缺當降旨飭令陶澍實心籌辦
鹽務茲據奏稱查明現在奏銷不誤庫內暫貯銀兩
足供正撥之需商情踴勉尙有起色等語辦理鹽務
全在轉運暢銷杜絕漏私之弊至楚省與兩淮本屬
一氣相通林則徐曾督兩江總督其於鹽務轉運交

關之處熟悉情形現經酌定道里遠近限期由水販交付鹽行送局齎道不准由州縣催繳可免需索留難辦理甚爲合宜其場岸鄰近梟私仍著不分畛域飭令文武員弁扼要巡查該督隨時稽核功過以示勸懲此外催徵催運各事宜陶澍惟當督同運司實力整頓以冀日有起色方爲不負委任至前次奏摺內有誤寫字樣其自請交部察議之處著加恩寬免

欽此

淮南丁酉綱無著懸引請提出二十二萬引融於
淮北行銷摺子

奏爲淮南疲商懸引無著援案酌撥淮北融運以期
趕副奏銷仰祈

聖鑒事竊照淮鹽雖分南北經理同一運司從前淮北
倒罷業已片引不行近因改行票鹽淮北引課連
次奏銷有贏無絀而淮南則仍形竭蹶各商力能
辦運者僅有數家內許宏遠尉躋美二家向係大
商楚西安慶等岸派運引鹽不下二十餘萬去冬
因疲乏倒歇臣於春間奏蒙

聖鑒在案嗣經開辦丁酉新綱節次剗飭護運司另招
新商承辦該二商懸引以期趕完額課去後茲查
各岸存剩殘引未銷并開江在途及各商已納課
米運之鹽尙幾及兩綱之數雖經臣與江廣各督
撫臣殫力籌維奈殘積過多一時實難暢銷商人
資本占閣完課甚屬拮据視辦運爲畏途以故尉
許二商空懸之引半載以來竟莫肯承充認運若
加派現運各商更屬力難兼顧計距來年奏銷之
期不及五箇月察看情形必須將該二商空懸之
引早爲籌畫方可望趕敷額課查嘉慶四年淮北

行運綱鹽因銷滯商疲遞年積壓經前鹽臣書魯奏明於己未庚申兩綱內各提出十萬單引融銷淮南江廣等岸欽奉

諭旨依議欽遵又查嘉慶八年續將淮北壬戌未銷引鹽融撥淮南十萬單引又嘉慶十三年復因淮北額引未能暢銷自己巳綱起至戊寅綱止每綱融入淮南行銷鹽四萬單引又嘉慶十六年淮北未運庚午引內分撥淮南十萬單引又道光五年淮北甲申綱未運鹽二十六萬六千餘引融撥淮南帶運均經前鹽政臣

奏准遵行各在案是從前淮北疲敝屢經融運淮南
代完北課幾以爲常現在淮南滯銷準情揣勢亦
宜將南課暫融於北以期通利查淮北自改行票
鹽以來上年造報乙未綱奏銷各票販溢請三十
二萬六千二百餘引因其鹽尙未全運經

臣

奏明查照上屆章程歸入丙申綱造報本年淮北各
場陸續曬掃捆清上年未運之鹽祇須再請票鹽
數萬引卽敷丙申一綱之額若因年額已清竟停
收售則民販挾貨來場旣未免空勞往返而各場
產積日多轉恐透漏滋弊

臣

與護運司姚瑩返復

熟籌莫如將丁酉淮南綱食引內提出二十萬引
連帶乙一分二萬引融運淮北行銷令民販完稅
請票卽將所完之稅撥補淮南許尉二商空懸之
課如此則淮南懸積之引有著各商卽可騰出資
本趕辦淮南應運之課以副來年二月底奏銷期
限一轉移間南北兩淮均得其便查淮北票鹽成
本較輕鄰私無從侵灌近年生齒日繁鹽斤本可
多銷祇因各處私充官滯是以銷路愈窄今票鹽
之法便民卽以裕課不但化梟爲良而且化私爲
官是官鹽之課旣得又添一倍化私之課撥此二

十餘萬引融於淮北并不至於窒滯兼今歲淮南各場因春間雨雪過多產鹽稍缺更當因時變通以收酌盈劑虛之用於歷年南北融運成案亦復相符毫無妨礙相應

奏明請

旨援照辦理以期南北兩利裕奏銷而免周章至南北每引正課大畧相同惟淮南外帶各項雜款爲數甚多此次融撥二十二萬引除將票稅經費等項儘數抵收淮南正雜課銀外其外帶各雜款尙有不敷仍於淮南綱食本岸所運引內分別加攤計

楚西科則連加攤融北外款每引共止完銀四兩
一錢有零并不爲重而安池太及各食岸科則仍
復有減無增據護運司姚瑩具詳請奏前來臣爲
預籌奏銷報完

國課起見理合恭摺具

奏伏乞

皇上聖鑒

訓示施行再此項融引攤派湖廣六萬引江西四萬引
安慶二萬五千引池州一萬引太平五千引寧國
三萬引上江三萬引合併聲明謹

奏

道光十七年十一月十三日奉到

硃批戶部議奏欽此

覆奏籌議稽察場竈章程摺子

奏爲遵

旨籌議稽察場竈章程恭摺覆

奏仰祈

聖鑒事竊

臣

接准戶部咨道光十七年五月十九日奉

上諭御史袁文祥奏私鹽充斥請設法清釐一摺各省
鹽引滯銷由於私販日多或弁兵遇有鹽梟未能實
力捕拏或兵役得賄縱私不行阻止鄰私由是充斥
而官引因以難行又商人於正引外帶有私鹽先儘
私鹽賣竣而後及正引私販私帶之鹽皆出於場竈

緝私而不究私所自出則弊源未遏安望鹽務日有起色著管理鹽務各省督撫鹽政嚴飭所屬移於場竈所在設法認真稽查所出之鹽毋使以多報少通同隱漏庶餘鹽不致泛溢四出卽正引之鹽亦不致爲私帶所積壓其如何酌定章程實力奉行可收實效之處該督撫鹽政等著各就現在情形悉心妥議具奏將此通諭知之欽此欽遵鈔錄原奏咨行前來

臣
跪讀之下仰見

聖訓周詳莫名欽服伏查兩淮引鹽額銷六省內淮北所轄之河南安徽江蘇等省前已改行票鹽遞年

逾額多銷各場竈地曬掃分設局卡查驗尙屬著有成效不致透漏場私其淮南所轄之江蘇安徽二省多被浙私侵灌江西一省閩浙粵三私侵灌湖南北則川私潞私粵私四面侵灌誠如

聖諭各省鹽引滯銷由於私販日多鄰私充斥之故節

經湖廣江西安徽督撫

臣

會商堵緝或接查銅鉛

船隻或嚴禁子店熬鍋或裁撤鄰界私店或廣設要隘卡巡凡可以設法疏銷者均已不遺餘力雖

兵役賄縱不能保其必無而派出弁兵如不實力

捕拏悉由督撫

臣

隨時撤參分別

奏咨有案至商鹽向在儀徵解捆每有重斤夾帶之

弊臣於道光十一年立定章程委員會同淮南監

掣同知認真稱驗嚴禁箕捆人等賣斤放砵商人

正引之外似不敢帶私鹽但船戶水腳尅扣難

免藉帶腳私復經嚴飭商人照數實發水腳并於

沿江上下分段派委員弁各帶兵役船隻護巡催

趲以杜沿途盜賣捏報淹消行之數年誠恐稍有

玩弛上年復專委候補同知伍家榕赴儀駐守督

捆予包務飭按斤配包毋許短發水腳間有斤重

不符之引經臣與湖廣督臣往返咨會懲辦是私

帶之鹽亦已漸清弊竇惟私販私帶之鹽皆出於
場竈緝私而不究私所自出則弊源終於未遏

聖明洞鑒實已握其要樞

臣

於淮南竈地嚴飭場官稽

查火伏并於海安溱潼及泰州北六場各要隘卡
巡委員莫不隨時告誡禁遏場私雖隱漏未必全
無而餘鹽當不致泛溢四出茲欽奉

諭旨遵卽飭行運司就現在情形再加確核如有未盡
之處卽會同臬司妥議具詳以憑核

奏去後嗣據護理兩淮鹽運使姚瑩會同署江蘇按

察使周祖植安徽按察使徐寶森詳稱場竈係產

鹽之所稽查少有不密透漏泛溢卽爲弊源茲查淮南各場年來點驗鹽鐵稽察私煎編發門牌挨查透漏且商人赴場重鹽均隨時嚴飭場壩橋所各官層層稽查掣驗不容稍有夾帶重斤立法實已周詳督辦尤未鬆懈各官如果認真查辦自不致尙有偷漏場私特是坐落通泰兩分司所屬場境內通州如臯泰州東臺興化鹽城阜寧七州縣向無行銷額引許貧難小民請給號籌每人每日赴場買鹽四十斤挑負該處村莊售賣如遇漁汛大船給鹽三千斤中船給鹽二千斤小船給鹽一

千斤因無定額每年除草堰場并無醃切食鹽及
角斜場僅止數引外其餘十八場按照產額自三
四釐至二三分不等共開銷至二十四五萬引幾
及淮南額引十分之二其中難保無奸民藉醃切
爲名或買等鹽暗中濟梟此項鹽斤雖出自場竈
但其中已輾轉更手梟徒隨地零收躉販其買自
何地何人未必盡能記憶以致各州縣獲犯到案
無從根究概行聲敘鹽非竈漏未始不由於此又
各場年終盤查滴耗每引開除自一二釐至一二
分不等通年共有十餘萬引亦難保無偷漏夾帶

任意浮開情弊今會同悉心體察以通州等七州縣滋生戶口約畧計之歲售鹽十餘萬引足敷民食及漁汎醃切之用各場歲可產鹽一百數十萬引應請

奏明嚴飭各場嗣後漁汎醃切食鹽除向來開報不及一分者仍照舊發賣不得加增外其餘各場每年止准照產收鹽數賣給十分之一每屆年終責成分司親詣各場認真盤查將折耗之數核實開報至多亦不得有逾當年產收鹽數十分之一如有多賣醃切食鹽及浮開滴耗由分司查明將該

管場員據實嚴參懲辦以絕場私等情臣查所議各條於近年核實辦理之外益復加以周密自應據詳

奏覆飭屬遵行惟事關奉

旨酌定章程必須不厭精詳方期經久無弊又經飭行運使陸蔭奎再行悉心妥議去後茲據該司詳稱體察情形弔齊各卷逐加覆核護運司姚瑩等所議實已允協無可另議請查照原詳具

奏前來

臣

覆核無異除飭通泰兩屬各場毋許多賣

醃切食鹽浮開鹵耗俾餘鹽不致泛溢卽正引得

以多銷仍查照歷次舊章嚴飭分司場員認真督
率竈丁按埭繳以編保甲嚴火伏以稽額煎商鹽
捆重出場隨時核實稱驗俾絕私源并飭各州縣
凡有營汛報獲犯鹽務須確究私鹽來歷不得仍
前巧爲開脫迴護如有各營將備不肯親督弁兵
實力查緝以及得賄縱私情事一經查出定卽據
實嚴參務期諸弊肅清可收實效以仰副

聖主整飭離綱之至意所有遵

旨查議稽察場竈章程緣由理合恭摺覆

奏伏乞

皇上聖鑒

訓示謹

奏

道光十八年二月十五日奉到

硃批務當認真辦理地方文武均係統轄有何難於措
施勉力而行以副委任欽此

請將淮北票鹽每引加徵雜課二錢同票鹽溢課
經費盈餘一併協貼淮南雜款摺子

奏爲籌解淮南雜款請將淮北溢課動支以資協貼
而應急需仰祈

聖鑒事竊照淮南正雜各項每綱應需五百餘萬遞年
正課二百餘萬兩尙可按分造報奏銷無誤惟雜
款錢糧向來須俟運完一綱之鹽方交清一綱之
課頻年岸銷積滯回課稽遲雖經湖廣江西安徽
督撫臣凜遵

諭旨竭力籌疏而額引未能全銷商力仍形疲乏凡京

外各衙門帑利規費等項爲辦公所需必不可緩之款半因商課未完無憑全解以致頻有

奏催咨催而運庫積欠尙多各處緊款待用不得不

向他款動那年復一年難免增累臣身任鹺綱時

深焦灼本年丁酉一綱於二月杪造報奏銷經臣

督飭運司催商納課早晚籌完正餉尙能勉副限

期轉瞬戊戌新綱又須開辦縱使岸銷漸暢而在

前殘積過多此時趲行匪易一切帑利規費等款

仍恐應解爲難再四躊躇別無長策惟查淮北引

餉原額止二十九萬六千九百八十二引數年

來各岸改行票鹽輕本暢銷收課充足每綱加帶
殘鹽總造報三十七萬五千餘引除商運官運之
外按年

奏准行票約在四十萬引內外節存經費溢課爲數
尙多竊思正餉雜課均屬度支淮北之票稅多增
固足資戶部撥用淮南之雜款少解致難免各處
催追欲圖催解有應實莫如酌盈劑虛應請嗣後
淮北奏銷每年仍按原額造報其加帶殘鹽尙有
庚寅戊子未帶之七萬九千數百餘引擬酌留江
運八岸每綱帶殘二萬引不過四年即可加帶全

清計淮北正殘各課俱已如額此外票鹽溢課及
經費餘存并每引酌量加徵雜課二錢共可得銀
三十餘萬兩以資協貼淮南雜款分別緩急先儘
解交庶各處需用有資亦免動那他款且戊戌開
綱淮南減完銀三十餘萬兩按照楚西科則每引
少交雜課三錢各商亦必形踴躍如將來南鹽旺
銷可以無資協貼抑或票鹽有時稍滯不能兼顧
淮南仍隨時體察情形由臣奏請停止歸商照常
徵解如此酌量變通辦理似於解款商情兩有裨
益至淮北雖向無雜款而近年票販頗能獲利每

引加徵雜課二錢亦不爲重現在已屆票鹽開局之期若待

奏定飭遵誠恐有稽收稅臣已札行總辦分司趕緊開局照辦以免遲誤所有籌解淮南雜款請以淮北溢課動支應解緣由謹繕摺縷悉陳明伏乞

皇上聖鑒謹

奏

道光十八年三月十一日奉到

硃批既開局照辦自必胸有成竹妥爲之該部知道欽此

奏明票鹽驗貨掛號章程附片

再本年票鹽開局販情踴躍風聞攜貨到場者已有二百餘萬兩而票鹽額數

奏明以四十萬引內外爲率未便任聽多運或致侵灌淮南現據該總辦分司等稟請驗貨掛號以引數扣合銀數分別按折派買并固有驗貨無銀空投手本掛號希圖轉賣獲利者深恐成本增重漸爲票法之害復經該總辦分司等酌擬驗明實係有銀辦運卽令親自畫押收銀貯庫俟派號之後如果銀浮於引仍將餘銀發還

臣

思票引有定而

興販人多欲杜弊端舍此亦別無辦法已飭行該
總辦分司等破除情面妥協辦理仍飭總辦委員
海州直隸州知州王用賓及海州營參將德本常
川在浦督帶兵役彈壓俾資鎮靜所有票鹽開局
現在辦理情形合肅附片陳明伏乞

聖鑒謹

奏

道光十八年三月十一日奉到

硃批知道了欽此

欽遵

諭旨保薦運使摺子

奏爲遵

旨保奏堪勝兩淮運使之道員請先行陞署察看再請
實授以重公務仰祈

聖鑒事竊臣承准軍機大臣字寄道光十八年二月初
五日奉

上諭本日據陶澍奏兩淮鹽運使陸蔭奎現在丁憂已
派委河庫道沈拱辰暫署兩淮運使一缺職司繁劇
必須勤明練達之員方能勝任著陶澍於所轄屬員

內慎加遴選據實保奏候朕簡用將此諭令知之欽此遵

旨寄信前來臣查兩淮運使總理淮綱當商力極疲之時誠如

聖諭非勤明洞達練習事機之員難期勝任臣所轄道府各員內廉明勤慎能於辦事者頗不乏人而於艱務均非所悉不但情形多有隔膜且往往視爲畏途罕肯留心前此惟江西南昌府知府張寅護理鹽道時尙肯任事第江西僅綱岸一隅非全淮發運之比此外更難其人如前任淮南監掣同知

姚瑩精明幹練經臣兩次

奏護運使辦理堪稱裕如上年已蒙

恩簡放福建臺灣道甫經赴任該處係海疆要缺關係

緊要

微臣

未敢保留又現任海州運判童濂自淮

北改行票鹽一手經理不避嫌怨業經六次奏銷

引課全完且有溢課及帶運前綱之課洵屬能爲

其難第該員職分較小且票鹽正資熟手亦未便

保舉外惟查河庫道沈拱辰前因其勤幹廉明辦

事頗有條理且歷任戶部山東司熟悉鹽務是以

奏請委令署理該道抵任適值截數奏銷之時釐核

款目趕催錢糧俱屬妥速認真商情亦尙協服合
無仰懇

天恩卽以該道陞署兩淮運使仍由臣隨時察看如果
辦理妥協俟一年期滿再行

奏請實授其河庫道一缺卽請

旨另行簡放以專責成所有臣遵

旨保奏運使請先行試署緣由理合恭摺具

奏伏乞

皇上聖鑒謹

奏

道光十八年三月二十七日奉到

硃批另有旨欽此同日奉到道光十八年三月十五日

內閣奉

上諭兩淮鹽運使著沈拱辰陞署仍著陶澍隨時察看
如果辦理妥協一年期滿再請實授欽此

查核上海會館并無囤貯私鹽暨舟山地方產鹽
應歸浙江經理摺子

奏爲核查上海縣地方會館并無囤貯私鹽情形暨
舟山產鹽請仍歸浙江省經理恭摺覆

奏仰祈

聖鑒事竊臣承准軍機大臣字寄欽奉

上諭御史高枚奏稱浙江寧波府屬洋面中之舟山產
鹽甚旺閩廣商船經過收買每制錢十二文一斗每
斗約二十斤載至上海每斤可售制錢二十文是其
利息不啻三十倍上海沿海一帶會館最多卽爲囤

貯之所兩淮鹽引滯銷大半由此惟舟山所出之鹽濱海窮黎藉資口食或就本地之價官買發商或令商買配引或以所出之地屬浙江歸浙江省經理或以所銷之地屬江南歸江蘇省經理等語兩淮鹽引滯銷總由私販充斥所致愚民惟利是圖難保不越境收買轉相售賣著該督卽行查明上海地方如果多設會館廣爲國貯務卽嚴密查拏毋稍寬縱至舟山所出之鹽應作何辦理并歸何處經理之處著卽會同烏爾恭額體察情形悉心籌畫妥議章程具奏將此各諭令知之欽此遵卽恭錄劄飭蘇松太道周

祖植密委丞倅嚴訪拏辦一面咨商浙江撫臣將
舟山之鹽應作何辦理并歸何處經理之處體察
情形會議具奏併將上海一帶係浙鹽引地與淮
界相距寫遠不致充斥緣由附片奏

聞在案嗣據蘇松太道周祖植稟覆飭委川沙同知何
士祁馳赴吳淞口沿海地方查明該處俱係濱臨
黃浦大江接連海口潮水漲落無定兩岸盡屬沙
灘并無設立會館之處復至上海縣一帶地方查
明城內城外有江蘇浙江福建廣東關東山東安
徽太湖各處商民共建會館一十三處皆爲寓處

同鄉及暫厝旅櫬而設間有堆積貨物處所均有董事經理絕無囤積私鹽情弊訊之居民保甲均無異詞惟查浙江定海縣之舟山產鹽甚多上海濱臨海隅其間閩廣兩省之鳥船乍浦洋面之硬檔鳥基等船浙省沿海之划船夾帶興販由川沙寶山沿海等處分售有小船分銷偷運進口轉賣實所不免自道光十六年以來各該廳縣計獲鹽犯二十六名私鹽十一萬斤有奇皆在三四百里以內近海港汊拏獲并不藉會館囤積以爲銷私之地復經該道親赴各會館確訪與該同知所稟

相同其吳淞口外停泊諸色船隻仍照常派委妥員實力巡查毋任夾私偷銷以杜來源而絕去路庶可期私淨引暢具稟前來臣思販私本干律禁會館設在市廛爲衆商公所共見共聞之地即使圖利透私亦斷不敢於人烟稠密耳目昭彰之下自取敗露是該道等所稱各會館并無囤積私鹽自屬可信惟川沙寶山沿海一帶有商船夾帶私鹽之弊不可不時加查緝臣已劄飭該道責令各該廳縣隨時稽查如有帶私情事卽行嚴拏從重究辦毋稍寬縱至舟山之鹽應歸何處經理一節

准浙江撫臣咨稱舟山係定海縣所屬原爲包課之區聽民自煎自食嗣因餘鹽串梟興販乾隆三

十六年

奏明動撥帑銀令定海縣營設廠收買撥交松江營四千三百引交商完帑領撥再有餘鹽聽嘉松商人領配完帑載在兩浙鹽志惟舟山孤懸海外應籌議堵緝已劄行運司妥議章程通詳核辦等語是舟山之鹽或由官買發商或令商買配引浙省本辦有成規其如何嚴禁商船收買售賣之處江省遠隔重洋未能深悉既經浙江撫臣督同運司

體察情形悉心籌畫卽應由該省妥議章程具

奏辦理除咨明浙江撫臣外所有核查上海各會館

并無圖私緣由理合縷悉恭摺覆

奏伏乞

皇上聖鑒謹

奏

道光十八年閏四月初二日奉到

硃批知道了欽此

覆奏范隄開壩例禁啟附片

竊前據御史成觀宣奏請申范隄開壩啟閉例禁
欽奉

諭旨交臣等會同查議具奏臣陶澍以該處開壩係農
田鹽課所關不可偏重其形勢高下非查勘未能
明確當經劄行江寧藩司會同兩淮運司委員查
勘議詳茲據該司等先後委勘會詳前來臣等覆
查兩淮泰州分司所屬地方有范隄一道本唐李
承寶所築捍海堰歲久漸圯宋發運使張綸用監
西溪鹽稅范仲淹之議奏築長隄置閘啟閉宜洩

以仲淹力贊成之遂有范隄之稱從前場竈均在隄內現在海灘日漲各場竈移埵就滷反在隄外相去五六十里之遙海潮已不能淹及惟地勢既改場竈亦移民人不知原委遂以爲范隄之設專爲民田祇禦鹹水不洩淡水道光十五年六月因雨水竈河泛溢將隄壩衝潰場商吉世昌等以埵場盤廩被淹請將各壩啟放并將已潰之壩暫緩堵閉旋有興化縣民人楊春等以場商朦禬范隄呈控批飭各地方官查明各壩實係被水衝潰場商第梟請緩堵并非私行開禬各在案溯查乾隆

年間各前督撫鹽政議定北六場隄身閘座每年
於三月堵閉九月開放惟留草堰正閘以濟重運
鹽船南五場沿隄土壩每年七八月大汛之時鹽
務地方各官相機會同啟閉非當盛漲場員不得
遽行開放若遇竈河泛溢地方官亦不得勒令堵
閉以便洩入串場河由丁溪等壩歸海商民相安
已久迨至嘉慶年間前巡撫臣岳起議將范隄閘
壩禁止開放竈河海口設法疏通而卒未能興辦
從此商民每各援案爭執查該御史原奏內稱隄
身閘壩有永遠實堵不准啟放者有夏秋堵閉以

防潮汎冬春啟放以便出入者非定限制難免倉猝競爭茲臣等細核南北兩場范隄閘壩情形以爲欲杜爭端宜示公允所有乾隆年間議定章程實可永遠遵守而無偏重之弊如有啟放不時及擅行阻止者卽行分別懲治庶於商民兩無所損俟籌有款項再將竈河挑浚以期分道疏銷至道光十五年開壩之案查明實係該商等呈請緩堵并非私乞應請無庸置議所有臣等會同查議緣由謹附片覆

奏伏乞

聖鑒謹

奏

道光十八年六月二十二日奉到

硃批依議欽此

淮南戊戌綱鹽請援案提出二十二萬引融運淮
北摺子

奏爲淮南懸引援案請融淮北并酌撥協貼淮南銀
兩以足戊戌課額仰祈

聖鑒事竊照戊戌綱淮南引課自本年四月開綱經
督飭運司按照上綱商請引數派令完納請運并
將上年

奏明之許宏遠尉躋美二商倒歇懸引二十餘萬設
法另招新商認辦無如綱食各岸遞年銷不足額
以致殘引愈積愈多商力不能轉輸新綱益形喫

重人皆畏累莫肯承充至今僅僉新商鮑良輔鮑
中輔二人所認縣引不過二萬空缺尙多現距來
年二月

奏銷之期不及四月統計存岸未售并開行在途及
已未完納新殘各引不下兩綱有餘本非數月內
所能運銷完竣並與署運司沈拱辰按限催徵不
遺餘力各該新舊商人尙知激發天良將原派認
運引數隨時勉力輸將可期趕副造報惟許尉二
商退縣引內扣除新商接認尙有二十萬引一時
旣難足數現商又無力兼顧若不及早另籌深慮

難敷課額伏查上年行運丁酉綱鹽因許尉二商
倒歇乏人接認經臣

奏准提出淮南綱食二十萬引連帶乙一分二萬引
融運淮北令民販完稅請票將所完之稅撥補懸
課其不敷外帶各雜款仍於淮南所運引內加攤
本年二月始得趕副

奏限今查上年造報淮北丙申綱

奏銷各票販有溢請二十一萬七千三百四引零

奏明歸入丁酉綱造報又上年年底止續請一百五
十三引共溢存鹽二十一萬七千四百五十七引

零又本年

奏准淮北按年行票約在四十萬引內外除照原額造報并將殘鹽酌留江運各岸加帶其餘票鹽溢課及經費餘存并專引加徵雜課二錢共可得銀三十數萬餘兩協貼淮南截至現在止已據海分司摺報共請運四十七萬七千餘引足敷本年造報奏餉及協貼淮南之數計仍餘上年溢請二十一萬七千四百五十七引零雖鹽斤尙未全運出場而淮北頻年旺銷止虞缺乏無虞壅滯值此淮南銷滯引積之時似宜仍行酌盈劑虛以期兩有

釋益令無仰懇

聖恩俯准援照上年融北之案於戊戌綱淮南綱食引內提出二十萬引連帶乙一分二萬引融運淮北行銷即將民販所完稅銀撥補淮南許尉二商空懸之課如此量爲轉移則淮南懸引均成有著准北各岸無虞缺銷而來年二月底

奏銷亦不致有遲誤至提出淮南二十萬引按照綱食料則輕重核算共該入

奏正雜課銀二十九萬八千餘兩外帶雜款三十餘萬兩以淮北每引所完票稅經費撥補淮南每引

應完入

奏正雜課銀有盈無絀其外帶各雜款上綱係加攤淮南引內徵完本年有

奏准淮北協貼淮南銀三十六萬四千餘兩以此抵補現融南引外帶雜款卽無庸再於淮南引內攤徵科則并未加增南運尤爲利益第上年票鹽溢請止二十一萬七千四百五十七引零今請受融南引連帶乙一分係二十二萬整數仍不敷二千五百四十三引零應於本年票鹽溢請引內撥足下餘溢請引課仍爲協貼淮南之用據署運使沈

拱辰具詳請

奏前來

臣爲預籌奏銷趕副

國課起見理合恭摺具

奏伏乞

皇上聖鑒

訓示施行再此次融引攤派湖廣六萬引江西四萬引

安慶二萬五千引池州一萬引太平五千引寧國

三萬引上江二萬引和州含山江浦六合句容溧

水高淳全椒八岸一萬引合併聲明謹

奏

陶文毅公全集

卷十八

奏疏

五

道光十八年十二月十六日奉

硃批戶部議奏欽此

淮北戊戌綱票鹽溢課經費盈餘及加增雜課合
共銀三十六萬餘兩協貼淮南雜款附片

再上年二月淮北丁酉開綱經臣奏請每年奏銷

仍按原額造報其加帶殘鹽酌留江運八岸分爲
四年帶清此外票鹽溢課及經費餘存并每引加
徵雜課二錢共可得銀三十餘萬兩以之協貼淮
南雜款分別緩急解交劄行總辦分司趕緊開局
照辦等因於道光十八年三月十一日奉到

硃批既開局照辦自必胸有成竹妥爲之該部知道欽
此茲查上年淮北協貼淮南雜款銀數據陞署鹽

運使沈拱辰詳明一上年溢請票鹽正稅共收銀
二十一萬七千五十六兩八錢一分八釐一上年
票販所完經費除撥補商課及應支各款外盈餘
經費銀五萬四千五百十一兩六錢二分八釐一
上年每引加徵雜課二錢共銀九萬五千四百一
兩八錢三共合銀三十六萬六千九百七十兩二
錢四分六釐均已全數解收運庫計符原

奏協貼淮南雜款銀三十餘萬兩之案合併附片陳
明伏乞

聖鑒謹

奏

道光十九年二月初三日奉到

硃批戶部知道欽此

淮南戊戌懸引仍請融北摺子

奏爲南鹽融北歷有例案可循懇

恩仍准照辦以疏積引而裕懸課仰祈

聖鑒事頃臣接准戶部咨淮南懸引請融運淮北行銷

一摺經戶部議駁覆奏奉

旨依議欽此欽遵咨會前來伏查淮鹽雖分南北課餉
同屬度支每當商疲岸滯之時不得不通融挹注
以期

國帑無虧是以兩淮鹽法例准融銷嘉慶年間淮北
已未庚申壬戌并自己巳至戊寅以及道光四年

分甲申等綱引鹽均經

奏准融運淮南代完北課卽鹽法志書內載康熙八年部議淮北壅引曾有改於淮南行銷之例可見南北融銷自

國初以來已歷百數十年并非始自近日前年因南商許宏遠尉臚美二家倒歇懸引二十餘萬經臣奏請將丁酉淮南綱引內提出正帶二十二萬引融運淮北由戶部議准荷蒙

俞旨在上案上年許尉二商懸引僅招有鮑中輔鮑良輔二商及現僉場商宋隆吉各據認行一萬引此外

舊商不能代爲加認新商復無可勒僉不得已循
照成案仍請提融二十二萬引歸於淮北代銷旣
與上屆情形無異更與歷年奏案相符誠如部議
暢滯例有融銷遵例而行似不得謂非正辦若如
部議所稱淮南懸課旣可融銷何以淮北積欠不
能加帶等語查懸課籌融係屬淮南緊款積欠加
帶不關部撥要需况自淮北改票以來帶完已庚
戌子殘課銀五十九萬八千餘兩歷綱附入奏銷
并非不行加帶祇以臣離綱總理必須南北通籌
此時融北入南正爲先其所急本年奏銷造報庶

可候部撥用似未便專顧淮北將十數年前積欠之銀胥於目前代完而轉置淮南緊款於不問至協貼淮南銀三十六萬餘兩原經

奏明爲籌解京外帑利各項要需計上年解過京外帑利等銀一百十萬餘兩卽有動支前項協貼銀兩在內而南鹽融北課款有正有雜正款以票稅溢請之銀二十九萬八千餘兩按引抵補足額其雜款卽係京外帑利各項要需現有協貼銀三十六萬餘兩足應解支無庸復似前年另於淮南引內加攤雜課銀兩以故摺內聲明南鹽科則無所

增加并非那爲融銷南引之用亦非將協貼淮南之項抵補缺銷正課款目分明可爲覆按竊思淮南自定新章迄今數載凡所以輕成本而利轉運者

臣

與厯任運使遇事講求次第舉行實已不遺

餘力無如鹽引疏銷遠在湖廣江西等省各督撫

臣

凜遵

聖訓未嘗不整飭有加而鄰私侵灌殘鹽壅滯以致新舊引目積壓不下兩綱淮南勉力辦運僅足自存其本小累深者卽時有倒歇之處此懸引鉅萬所以加認無商而招募新充益復聞風裹足也然

臣

自辛卯至丁酉七綱之中已報過奏銷六次復帶完已庚半綱而丙申丁酉兩綱又將乙未分帶課銀隨正報完候撥較之道光元年至十年爲止辛壬癸各銃半綱丙戌丁亥銃銷綱半已丑停運三分庚寅全綱停運十綱之中奏銷不足六綱猶復解款屢請扣留以爲在外歲支各用前後參觀似覺稍分贏絀實緣淮綱頽廢未易挽回不得不酌盈劑虛隨時通變於萬難措手之中爲竭慮綱繆之計始得以勉力奏銷茲次支持今戊戌奏銷二月卽須

題報查向來鹽課錢糧照州縣地丁之例按分計算
淮南入奏正餉每一分十八萬兩有奇以南融北
不過該銀二十九萬八千餘兩按分扣算不足二
分定例鹽課考成欠一分以至五分鹽政運司均
應罰俸至降職處分

臣

與運使受

恩深重卽捐糜頂踵未足云報又豈敢因處分有例避
重就輕預爲二月奏銷地步惟是兩淮大局爲東
南財賦所關邇年困敝情形久荷

聖明洞鑒此次融北二十二萬引不蒙

允准轉瞬奏銷報部卽少完二十九萬餘兩積存引目

又多懸二十餘萬道非獨現綱支絀卽下綱亦無
可另籌再欲招募新商竊恐緩不濟急若更責成
舊商追呼孔迫必致衆情渙散一蹙而不可復振
臣身肩鉅任豈敢敷衍目前不顧大局是融運淮
北正所以疏引裕課并非不計及久遠總之兩淮
舊例歷有融銷上屆籌融已蒙

俞允合無仰懇

天恩俯念淮南大局關係緊要仍准將戊戌綱課照依
歷辦舊章融運淮北二十二萬引以清引課而副
奏銷感荷

鴻慈實同再造據署運使沈拱辰具詳請

奏前來所有淮南引課融運淮北仍請照辦緣由理
合縷晰陳明恭摺覆

奏伏乞

皇上聖鑒訓示謹

奏

道光十九年二月初五日奉到

硃批戶部再行核議具奏欽此道光十九年二月十五
日准戶部咨道光十九年二月初五日奉

上諭前據陶澍奏請仍將淮南縣引融運淮北行銷當

交戶部再行核議茲據奏稱引目各有定界融銷并非正辦惟淮南素稱疲敝奏銷現已屆期姑准量爲轉移等語著照所請卽將戊戌綱懸引提出二十二萬道融於淮北行銷所有懸引 銀按數抵補足額經此次格外調劑該督務將本綱應徵帶徵等項迅速掃數全完務於二月奏銷依限造報并妥速招商認辦懸引不得藉有融銷之案習以爲常致滋鬆懈

欽此

縷陳八年來辦理兩淮鹽務并報完銀數比較在前情形附片

再查兩淮鹽務爲東南財賦之區

國帑民生攸關甚鉅自嘉慶末年口岸滯銷商情困敝大局難支馴至道光十年鹺綱廢壞已一蹶而不可復振仰奉

特旨裁除鹽政改歸總督管理臣受事之初原知整頓維艱實與從新起造無異祇以渥承

高厚不敢避事畏難用是任怨任勞力圖報稱數年以來仰荷

聖明洞燭隨時

指示機宜如裁浮費散輪規禁私梟輕課本均能培養
商力保固庫儲故自道光元年辛巳綱起至十年
庚寅綱止十綱之中淮南商辦課運止有五綱七
分而欠

帑之數積至一千九百八十餘萬今自道光十一年
辛卯綱起至十七年丁酉綱止七綱之中已報過
六綱奏銷而帶完乙未一綱亦納有三分之課除
十八年戊戌一綱仰沐

天恩准將南課融北現經督飭運司趕辦奏銷卽日截

數移交後任造報外通計已報部撥正款共銀八百八十四萬三千一百六十七兩九錢七釐仍有專案起解之織造銅斤河餉銀一百七十八萬四千二百七十三兩二分厯綱報解京外帑利各省鹽規匣費并解京節省漫斤變價共銀六百四十四萬二千三百八兩七錢八分九釐而在前統引借

帑扣留等事八年來從未上瀆

宸聰且於正額之外完過已庚殘課新疆經費積欠漫價歸還墊款共銀三百二十七萬七千三百五十

八兩六錢三分皆辛卯以前歷前任所欠而帶完於辛卯以後此淮南歷綱課運之實情也又淮北自道光元年辛巳綱起至十年庚寅綱止十綱之中僅運及三綱四分有零其銑銷停運融南各項多至六綱五分以外而十綱應完課銀二百七十一萬餘兩僅完銀七十萬四千餘兩實未完銀二百萬六千餘兩今自道光十一年辛卯綱起至十七年丁酉綱止七綱之中除徵足奏銷銀一百八十九萬七千二百七十六兩四錢九釐仍有專案起解之織造銀十五萬四千兩又代辛卯以前徵

完過已庚戌子殘課銀六十一萬六千六百四十
六兩二錢一分四釐仍有溢完課項撥抵淮南縣
課銀九十八萬九千四百七十五兩六錢五分五
釐計按額溢徵銀一百六十萬六千六百三十一
兩八錢六分九釐而戊戌本綱開局驗貨已經收
稅未解運庫銀兩尙不在此數內此又淮北改行
票鹽徵收票稅之實情也以上淮南北正雜課款
統計報完銀二千四百萬四千五百六兩六錢二
分四釐在淮北改行票法輕本便民課額充溢實
已大收成效惟淮南引地遠行湖廣江西等省一

切疏引緝私究屬鞭長莫及以致鄰鹽侵灌口岸
滯銷新舊引張多形積壓每綱

奏銷僅完課八分有零雖下綱補足究非於本綱內
十分全完而

帑利鹽規匣費等雜款因口岸緩納銀兩回課較遲
報解亦稍從緩此則舊規未復深慙上負

恩知然臣體察情形實亦淮綱頽廢未易挽回不得不
酌盈劑虛以期勉籌課運未敢操切從事轉使商
情渙散全局難以支持至淮北票鹽或有以侵灌
淮南爲詞者臣查道光元年至十年爲止淮北統

運不足三綱而銃銷停運融南各引共一百七十
四萬四千餘道計此十年之內淮南銃銷停運之
鹽亦卽有五百九十餘萬引彼時并未行票何以
北引旣經積存南鹽又復積滯可見南綱之疲乏
非關北票之侵充而自改行票法以來淮北協貼
淮南除本年現已徵存之三十數萬餘兩未據運
庫報收外實計兩年之內共又代完南課銀九十
八萬九千餘兩似乎轉移通變尙堪挹注度支
國計所關不無裨補再查兩淮外支如辦貢辦公等
款從前額徵銀七十萬兩仍須加徵不敷銀數十

萬兩今自道光辛卯年起或按綱列徵或隨時減
完每綱核計支銷不出三十萬兩內外較之往年
實已大有節省茲臣因病懇

恩開缺調理所有八年來辦理鹺務比較在前情形理
合附片縷晰陳明伏乞

皇上聖鑒謹

奏

道光十九年三月二十一日奉到

硃批覽奏均悉欽此